

**Den 2011 Ta Napa Autoparts ta esun cu tin
tur bo piesanan di bon prijs y calidad**

Bishita nos na

Cura Cabay 145
Tel: 584-5046

Sabana Blanco 70
Tel: 583-4363

Shaba 1
Tel: 587-0621

Cu shobel den man Ministernan Donner, Eman y Sevinger a start proyecto den Caya Grandi

“**SHOBEL** cu shobel” cu e variacion aki riba e lema di Gobierno “schouder cu schouder” Ministernan Donner, Eman y Sevinger cu un shobel den man a duna inicio n’e trabounan grandi di restauracion den Caya Betico Croes diahuebs cu a pasa.

“Mi a bin aki pa fiesta e celebracion di 25 aña di Status Aparte y di biaha mi tin cu traha”, asina e Minister di Relacionnan Interior y Asuntonan di Reino, Piet Hein Donner a chansa.

Despues di su yegada na Aeropuerto Reina Beatrix Minister Donner a wordo hiba pa centro di Oranjestad pa hunto cu Ministernan Eman y Sevinger duna inicio formal n’e trabounan den caya grandi.

Na luna di februari a keda anuncia cu e compania MNO Vervat a gana e bidding p’e prome fase di restauracion di caya grandi. E proyecto aki ta parti di un

programa extenso di inversion cu Gobierno a diseña pa di un banda restablece e parti “bieu” di Aruba y di otro banda duna un empuhe fuerte na nos economia.

MNO Vervat ta traha riba e capa bou di e caminda nobo cu ta bay bin. E trabou aki ta encera e facilitacion di riolering, awa y electricidad. E suma envolvi ta 2,6 miyon florin y ta bin di e fondo di desaroyo FDA.

Eynan tabatin placa cu no a wordo usa cu a haya asina un otro destinacion. Mirando cu e placa den FDA ta bin di tanto Aruba como Hulanda, e cambio aki por a wordo haci solamente cu cooperacion di Minister Donner.

Prome Minister Eman a gradici Piet Hein Donner pa su cooperacion y a acentua cu hincando hunto e shobel den tera cu e gesto aki ta para simbolo p’e bon

colaboracion dentro di Reino.

“Dor di bon deliberacion y bon plan nos por a pone e proyecto aki den otro. Un proyecto cu ta bon p’e comerciante, p’e publico cu ta bin haci compras y pa economia di Aruba”.

Minister Piet Hein Donner a afirma cu un mihor acesibilidad pa centro di ciudad ta un rendimento grandi pa Aruba. El a sigui bisa di ta contento cu e por a yuda dor di haci cambio den destinacion di e placa disponibel.

El a observa cu esaki tabata algo simpel pa haci, ya cu e placa tabatey caba.

“Den e temponan economico dificil aki no t’asina cu unda cu ta bo ta haya un saco di placa”, segun Minister Piet Hein Donner.

Minister Benny Sevinger a gradici tur cu a yuda cu e proyecto aki y despues e sho-



belnan por a bay den tera.

“Aki dos aña mi ta bin bek pa wak si e proyecto aki ta cla”, asina Donner a bisa. Eman a

contest’e bisando cu e no mester para riba e mesun lugar, pasobra cu eynan un tram Hulandes lo core.